

Date – 24/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- 1. Mizoram Tipper Association bultuma Vairengte leh Aizawl inkar kawngpui siamthat nawr nana National Highway danpin chu nizan dar 7 khan hlih a ni.**
- 2. Mizoram State Legal Services Authority leh Administrative Training Institute tangkawp buatsaih, Sawrkar hnathawkte puala Dan chungchang inzirtirna hun nimin khan Aizawlah neih a ni.**
- 3. Bihar Assembly inthlan campaign in a vanglai a thleng chho mek**
- 4. Defence Minister Rajnath Singh-a thukhawm Defence Acquisition Council chuan cheng vaibelchhe sing 7 leh sang 9 hu ralthuam lei rawtna a pawm.**

<><><>

NATIONAL HIGHWAY BLOCKADE

Vairengte leh Aizawl inkar kawngpui siamthat nawr nan ni khat chhung National Highway kawngpui an dan chah hnuah Mizoram Tipper Association leh Kolasib Joint Action Committee ten nizan khan an lungawilohna lantirna an ti tawp.

Kawngpui dang lo tur hian sorkar chuan khauh taka hma la in nimin khan Kolasib Tipper Association mi 25 manin Kolasib Police Stationah an dah a, nizan khan District thuneitute nen inbiain harsatna siam lo tura thu an dah hnuah Lock Up atang hian chhuah an ni.

Nimin khan Kolasib District Magistrate chuan thupek chhuahin, Mi tumahin mimal leh pawl, intelkhawm leh inzawmkhawm anga action committee din chawp emaw pawhin state eibar lakna kawngpui Bairabi – Kolasib, Vairengte – Khamrang leh Kawnpui – Durtlang te engvang mahin an dangchat tur a ni lo a ti a. Heng atanga metre 10 huam chhungah Dan lo a mi panga aia tam awmkhawm phal a ni lo a, He thupek hian thuleh awm hma chuan thla hnih chhung a huam ang.

Kolasib District, Addl. District Magistrate Pi B. Malsawmtluangi chuan Kolasib District huam chhung National Highway kawng chhia avangin lungawilohna lantira kawngpui danchah chungchangah hian theihtawp chhuahin NHIDCL hotute leh contractor te pawhin hma la in siamthat hna an thawk mek a, hetianga theihtawp chhuaha kawng tha lo lai pawh siam a nih mek laia kawngpui danchah tumna chu mipuite tana harsatna nasa tak thlena buaina lian zawk ti chhuak thei a ni a ti.

Kolasib District huamchungah Bairabi – Kolasib highway, Vairengte – Khamrang highway leh Kawnpui – Durtlang BRO, KDA road dan kalha dan

chah chu dan kalh a ni a. Ni li chhung Zoram pum ei leh bar lakna kawng dan pin chu mipui te tawrhna nasa tak thlen thei anih avangin mipui him tlanna tur leh harsatna nasa zawk an tawh lohna turin khapna thupek chhuah a ni a ti bawk.

Hetihlai hian Kolasib Rengtekawna Kolasib Joint Action Committee duty zinga tel JAC Vice Chairman Pu H. Lalchhanchhuaha chuan kawng tha duh avanga kawngpui dang an ni a ti a, hun rei tak chhunga kawng chhia avanga an tawrhna chu a nasa tawh hle a, kawng tha an neih theih nan theihtawp an chhuah dawn tih a sawi a ni.

<><><>

SELCO SOLAR PROJECT

National Health Mission, Health & Family Welfare Department, leh SELCO Foundation tten Mizoram chhunga Health Centre zawng zawngah Ni zung chakna hmanga power siamchhuahna a bun kim.

Health & Family Welfare Dept Jt Secy Pi Lalnunmawii hova nimina MINECO a SELCO Foundation Programme hmannah he thu hi tarlan a ni a, SELCO Foundation ten Mizoram chhunga district hrang hranga Health Centre hmun 530, heng Sub- Centre379, Primary Health Centre 69 leh Health Clinic 82-ah te Solar Power System dah a nih thu leh Directorate of Health Services (DHS) a Walk-in Vaccine Cold Storage bun fel a nih thu tarlan a ni a, an hna an zawh tak hnu nimin khan SELCO Foundation chuan Health & Family Welfare kutah a hlan a ni.

Planning Department Secy Pu Lalmalsawma Pachuau chuan Sawrkar hotute leh SELCO Foundation te zarah Mizoram chu mel lung pawimawh tak, North East State zinga State puma Health Centre-te solar power hmanga thuam kim thei hmasa ber a ni a ti a. Sik leh sa inthlak danglam ah pawh Health Centre ten harsatna an tawh thin a sukiang tura beisei a ni a, khawl leh hmanrua an bun te uluk tak vil zui a, tangkai taka hna a thawh theihna tura enkawl zui a ni dawn a ti.

National Health Mission Mission Director, Dr. Lily Chhakchhuak chuan heng nizung chakna hmang a power siam chhuah hian hriselna lama thawktu te hna a tichakin, vantlang mipui hmun kilkhawr zawka awm te chuan hriselna lamah tangkai takin an hmang thei dawn a ni tih a sawi bawk.

An chhut danin, Ni zung chakna hmanga power siamchhuahna bun avangin Mizoram mipui district 11 a awmte chuan nau neih leh naupang hriselna, hri danna leh thildangah awlsam zawkin an hmang tangkai thei tawh ang a.

Hriselna lama thawktu mi 3000 chuang ten him zawk leh tha zawkin hna an thawh theih phah ang.

Ni zung chakna siam chhuah belhkhawm mi 1.1 Megawatt a ni a, hei hian kum 20 chhunga boruak thianghlim lo tonne 53,260 hu vel siamchhua tur chu a ti bo dawn a ni. Khaihlak lo a power a siam dawn avangin nau piang leh nau chungah thi a tih tlem phah beisei a ni. Sik leh sa inthlak danglam avanga hrasatna a thlen pawh in khailak lovin power an nei tawh dawn a ni.



LEGAL AWARENESS

Mizoram State Legal Services Authority (MSLSA) leh Administrative Training Institute (ATI) tangkawp buatsaih, Sawrkar hnathawkte puala Dan chungchang inzirtirna hun chu ATI Auditorium-ah nimin khan hman a ni a. A hawнна hunah hian Justice Michael Zothankhuma, Gauhati High Court Judge leh Executive Chairman, Assam SLISA, leh Justice Yarenjungla Longkumer, Gauhati High Court Judge te an tel a ni.

Justice Michael Zothankhuma chuan Dan hriat chu tha taka hna thawh nan a pawimawh thu sawiin, Indian Penal Code chu Bharatiya Nyaya Sanhita-in a thlak tawh thu te, Dan bawhchhiate hrem leh tuartir ngawr ngawr lam ni tawh lovin mipui vantlang tana service tha pekna atan hman a nih tawh thu a sawi a. Tunlai thiamna sang zelah Court thurem dan pawh a danglam chho zel a, Court-a inkhinna pawh Court chhungah kher ni lo, online hmangte pawha tih theih a ni ta zel a, a awlsam ta hle a ni, a ti.

Justice Michael Zothankhuma chuan tunlai media chak tak karah thu sawi leh thil tihah fimkhur a tul tawh thu sawiin, media chu mitin dikna chanvo humhalh nan hman tangkai a tul tawh a ti a. Dan bawhchhiate hrem loha an chhuak leh mai thin chu sawrkar hnathawkte’n tih tur an hlen chhuah tawh loh vang a nih tel thu sawiin, tan lak tlan a tul thu a sawi bawh.

Justice Yarenjungla Longkumer pawhin thu sawiin, Fundamental Rights awm mahse mipuiin an tih ve tur lam - Fundamental Duties hriatna kawngah tan lak a tul tawh a ti a. Mi dik lote hremna kawngah dan, service matter, inhremna dan leh conduct rules hriat chian a tul hle thu sawiin, hemi atan hian sawrkar hnathawkte chu tan la sauh sauh turin a fuih bawh.

Sawrkar hnathawh 100 chuangin training hi an chhim a. Hetiang training hi District zawng zawngah neih tum a ni a, a thawh khatna atan Aizawl District-ah hman a ni.



TAWIZO KUT

Ṭawizo khua Village Council leh All NGO-te buatsaihin Kum 2025 Ṭhalfavang Kût chu nimin khan an hmang a, he hunah hian Bialtu Minister Prof.Lalnilawma chu khuallian niin hun a hmanpui. Pu Lalmuanpuia Punte, MLA in a tawiawm bawh a ni.

Minister chuan thusawiin Ṭawizo chu Ṭawi bial hming put chhan a ni a, Saitual District-ah khaw té ber zing ami ni mah se, an têt bik loh zia sawiin mi ropui tak tak an chhuak tawh a, an la chhuak zel thei a ni tiin Ṭawizo tihmingthatu ni ṭheuh turin a chah a ni. Kalkhawmte chu Ṭawizo khua aiawh palai an ni tih inhrereng turte, a nuam lam zawng mai piah lamah a tha zawnga hming thantirtu ni zel turin a chah bawh.

He hunah hian Saitual DC Dr Lalgura Tlau pawhin thu sawiin Ṭawi khuate’n ramgaw an humhalh avanga khaw 10 chuangin tui hnianghnar an nei a ti a, midangte tan malsawmna an ni a, an têlo a ni a ti bawh.

Kut ah hian YMA chhang Chheihlam, Govt. Primary School Tawizo Zaipawl, Tawizo MHIP lânte thlirho anih bakah MZI, Saitual Headquarters leh hmun hran hran atangin zaithiam tak tak ngaihthlak a ni.

<><><>

PRASHASAN GAON KI ORE

Lunglei District Deputy Commissioner (Bawrhsap) Office bul tuma mipuite'n sawrkar hma lakna hrang hrangte an chhawr tangkai theih nan an khuaa kal chilha service hrang hrang chhawp chhuahsakna, "I Kawtkaiah Sawrkar" (Prashasan Gaon Ki Ore) thawh hnihna chu nimin khan tan a ni, Haulawng leh a chhehvel khaw mipuite tan Hausiampa Hall, Haulawngah hun buatsaih a ni.

Kumin January ni 14 atanga May ni 14 inkar chhung khan Lunglei District chhunga khaw paruk - Haulawng, Ralvawng, Bungmun, Tlabung, Lungsen leh Bualte-ah te "I Kawtkaiah Sawrkar" thawh khatna kalpui niin, sawrkar department hrang hrangte'n mipui service an chhawp chhuah chu he'ng khua leh a chhehvela mi 5,082 te'n an chhawr tangkai a. Nimin atang khan a thawh hnihna kalpui leh niin, kar leh chhung khian Lungsen, Bungmun leh Tlabungah te kalpui chhunzawm a ni ang.

Haulawnga hun buatsaihah hian Lunglei Sub-Deputy Commissioner Pi Lalnunchhanin Hnamte chuan hawna thu sawiin, "I Kawtkaiah Sawrkar" hma lakna chu mipuiin District hmunpui pan kher ngai lova awlsam zawka sawrkar office hrang hrang an dawr theihna remchang a nih angin chhawr tangkai tum theuh turin mipuite a chah a. Haulawng VCP Pu Lalsangzuala Chhangte pawhin Lunglei Bawrhsap hma laknaa an khuaa office hrang hrangin an kal chilh chu lawmawm an tih thu a sawi.

I Kawtkaiah Sawrkar hun buatsaihah hian office hrang hrang - DC, District Civil Supply Office, Social Welfare, Health & Family Welfare, AH & Veterinary, Horticulture, BDO Lunglei leh Mizoram Rural Bank (MRB) te'n stall hawngin, awlsam zawka mipuite dawr theih turin an inpho chhuak a. Aadhaar siam that/siam thar, member belh/paih & ration card leh Aadhaar thlun zawm, bank account hawn thar leh sawrkar scheme hrang hranga inzhiah luh leh mipuiin harsatna an thlenna hun te buatsaih a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

DULTE MPACS

Cheng nuai 8 senga sak, Dulte Multipurpose Primary Agriculture Credit Societies Building chu nimin khan Cooperative Societies Registrar Pu John LT Sangan a hawng.

Pu John LT Sanga chuan Dulte MPACS Building hawn tak chuan khawtlang thawhhona tha tak hnuaiah a kaihhnawih hrang hrang te'n lungrual takin hma an la tlang tih a entir a ti a, khawtlang tana an thahnemngaihna a chhuanawm a tih thu a sawi. Co-operative hi Mizo ten tih tak zet a an luhchilh a hun hle a, Society chuan hlawkna ai mahin mipuite hnenah thiltha leh nitin mamawh pek chhuah a tum a, retheihna umbo a, dawm kan ngai dawn kanna hmanraw pawimawh tak a ni a ti.

Dulte MPACS member te pawhin Society thil tum hriaa pawl hmasawnna bakah khawtlanga chhawmdawl ngai te chhawm dawltu ni turin a fuih a. Sorkarin Society kaltilanga khawtlang nitin mamawh tih theihna tur tam tak a ruahman a, chung chu haichhuak thei turin MPACS member te chu ngaihtuahna seng a khawtlang tana chhenfakawm ni a, khawtlang mipui te pawhin Society te tawiawma hmasawnna nei turin a sawm bawk a ni. Pu John LT Sanga chuan Dulte MPACS-ah hian a hmasa ber atan Account a hawng nghal a ni.

Dulte MPACS Building hi Dulte MPACS sum hmanga sak a ni a, kumin March thlaa sak tan niin nimin khan zawhfel a ni.

<><><>

BIHAR ELECTIONEERING

Bihar Assembly inthlan campaign in a vanglai a thleng chho mek a. Nimin khan Prime Minister leh BJP hruaitu Narendra Modia chuan BJP-NDA worker te nen inkawmna hun a hmang a. Pu Modia chuan ramtin chak takin hma a sawn thu sawiin Bihar pawhin he hmasawnna kawng hi a zawh ve zel a ti a. Sawrkar laipuah leh Bihar ah sawrkar nghet tak a awm avangin hmasawnna hna pawh chak takin a kal thei tih a sawi a. Sawrkar a ngheh chuan hmasawnna chu a lo thleng zel a ti bawk.

Hetihlai hian Bihar Assembly inthlan lo awm turah opposition tangrual Mahagathbandhan chuan Rashtriya Janata Dal hruaitu Tejashwi Prasad Yadav chu Chief Ministerial Candidate atan an puang. Congress election observer leh Rajasthan Chief minister hlui Ashok Gehlot chuan vawiin khan Patna-ah Chief ministerial candidate hi a puang a. Grand Alliance an sawrkar anih chuan Vikasheel Insaan Party hruaitu Mukesh Sahani chu Deputy Chief Minister a nih tur thu a sawi bawk a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 127-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information

and Broadcasting Ministry-a YouTube channel-ah live-stream a ni baw k ang.

<><><>

DAC

Defence Minister Rajnath Singh-a thukhawm Defence Acquisition Council chuan cheng vaibelchhe sing 7 leh sang 9 hu ralthuam lei rawtna a pawm. Defence Ministry thuchhuah danin heng ralthuam lei turte hmang hian ramchhung sipaite thuamchak an ni dawn a. Ralthaum lei turte hi Indian Army te tan niin Nag Missile System, Ground Based Mobile ELINT System leh High Mobility Vehicles te a tel a ni.

<><><>